

Confeugo 2019

Sciô Scindico,

pe sto Confeugo ò pensòu de mette da parte i sòliti mogogni pe parlâ do futuro da nòstra Zena. No l'é che no ghe segge di mogogni da fâ perché aministrâ 'na çitàe comme Zena, spece dòppo a nascita da Grande Zena do 1926, a l'é 'na cösa complicâ e gh'é de longo quarchedun scontento; do resto anche a mi m'é cao mogognâ...

Ben, comensemmo co-a coltua. L'é ciæo che semmo tutti d'acòrdio ch'a va incentivâ e ch'a va reiza façilmente disponibile. Tra i tanti mezzi pe avixinâse a-a coltua gh'é e biblioteche e i centri civici. E chi m'an vosciuo dî che a mancanza do recangio do personale ch'o va in penscion o comensa a creâ di problemi pe-a gestion de biblioteche e di centri civici. No solo perché o personale o l'é pöco, ma anche perché se van via i vegi do mestê chi mostriâ comme louâ a-i zoeni, quande saian asonti? Pe questo me permetto de domandâghe se a voxe ch'ò sentio a l'é vea e comme stan e cöse.

Cangiando o discorso, sciâ me lasce fâ 'na propòsta picinetta. Dæto che in çitàe in pö de verde o gh'é, no se porieiva fâ in mòddo de savei o nomme di erboi e de piante che abeliscian Zena? Se porieiva mette de etichette ò dunque predisponn-e 'na pagina Internet dove poei leze i nommi de piante stradda pe stradda.

Gh'é 'n atro argomento che m'é cao tocâ. 'N anno fa, precisamente o 29 d'òtobre do 2018, a croxe de færo ch'a l'ea in çimma a-o Monte Fasce a l'é vegnuva zu con grande dispiâxei di zeneixi. L'ea ciù de 'n secolo che quella croxe, erta 14 metri, a poeiva ese amiâ lasciù a 800 metri d'artessa; fòscia o basamento o l'aiva fæto da ruzze; fæto sta che comme o vento o l'à sciusciòu in pö ciù fòrte a croxe a l'é deruâ. L'é pasòu in anno e a croxe a l'é ancon li, acoêgâ in tæra aspêtando che quarchedun o a tie sciù. A Compagna a l'à za scritto a-a Curia pe vedde de fâ quarcösa. E ancheu son chi a dilo a Voscià pe çercâ d'acapî cöse peu fâ o Comun pe risòlve questo problema.

Se diâ che gh'é cöse ciù inportanti, che i dinæ saieivan speixi megio in òpere sociali e d'ascistensa. Chi mi veuggio ribadî che anche i scinboli son inportanti: son i mezzi co-i quæ in pòpolo o veu mostrâse: Zena e i zeneixi son raprezentæ da-a bandea de San Zòrzo e da-a Lanterna, ma anche, magari solo in stisinin, da-a croxe do Fasce. Pe questo òcore rimettilla torna drita in pê.

Concluddo parlando de Zena. Zena a gh'à inportanti ecelense: penso a-o pòrto, a-i uspiæ, a l'universcitæ, a l'IIT, a-a naotica, e atro ancon; tutto bello, ma i zoeni pe travagiâ devan anâsene. Manca de longo i dinæ pe fâ infrastrutue inportanti e necesaie. Pe questo pâ quæxi in miracolo avei comensòu a tiâ sciù o neuvo ponte in sciâ Ponçevia. E ciù tante vòtte Zena a l'é abandonâ anche da-e famigge zeneixi ciù inportanti e ciù ricche che no investan ciù in sciô teritöio. Aloa devimo ese niatri, e quande diggo niatri penso sorviatutto a-o Comun, a ritrovase sotta a bandea de San Zòrzo, croxe rossa in campo bianco, comme se semmo ritrovæ inta giornâ da "Bandea de Zena", pe riscrovî a nòstra identitæ de gente ch'a se da da fâ, ch'a se redoggia e maneghe e a no l'à poia de louâ. Pe fâ e pe cresce, comme sciâ dixè Voscià, bezeugna creddighe. Niatri da Compagna e, ne son seguio, i çitadin de Zena ghe credemmo, ghe semmo e voemo dase da fâ sotta a goidda do Comun.

Tanti ouguri e scignorîa a Voscià e a tutti. Pe Zena e pe San Zòrzo!
Franco Bampi

Confuoco 2019

Signor Sindaco,

pe questo Confuoco ho pensato di mettere da parte i soliti mugugni per parlare del futuro della nostra Genova. Non è che non ci siano dei mugugni da fare perché amministrare una città come Genova, specie dopo la nascita della Grande Genova del 1926, è una cosa complicata e c'è sempre qualche scontento; del resto anche a me piace mugugnare...

Bene, cominciamo con la cultura. È chiaro che siamo tutti d'accordo che vada incentivata e che vada resa facilmente disponibile. Tra i tanti mezzi per avvicinarsi alla cultura ci sono le biblioteche e i centri civici. E qui mi hanno detto che la mancanza del ricambio del personale che va in pensione comincia a creare dei problemi per la gestione delle biblioteche e dei centri civici. Non solo perché il personale è pöco, ma anche perché se vanno via i vecchi del mestiere chi insegnerà come lavorare ai giovani, quando saranno assunti? Per questo mi permetto di domandarle se la voce che ho sentito è vera e come stanno le cose.

Cambiando discorso, mi consenta di fare una piccola proposta. Poiché in città un po' di verde c'è, no si potrebbe fare in modo di sapere il nome degli alberi e delle piante che abelliscono Genova? Se potrebbero mettere delle etichette oppure predisporre una pagina Internet dove poter leggere i nomi de piante strada per strada.

C'è un atro argomento che vorrei toccare. Un anno fa, precisamente il 29 d'ottobre del 2018, la croce di ferro che era in cima al Monte Fasce è venuta giù con grande dispiacere dei genovesi. Era oltre un secolo che quella croce, alta 14 metri, poteva essere vista lassù a 800 metri d'altezza; forse il basamento aveva fatto della ruggine; fatto sta che come il vento ha soffiato un po' più forte la croce è crollata. È passato un anno e la croce è ancora lì, coricata in terra aspettando che qualcuno la tiri su. La Compagna ha già scritto alla Curia per vede di fare qualcosa. E oggi sono qui a dirlo a Lei per cercare di capire cosa può fare i Comune per risolvere questo problema.

Si dirà che ci sono cose più importanti, che i soldi sarebbero spesi meglio in opere sociali e d'assistenza. qui desidero ribadire che anche i simboli sono importanti: sono i mezzi con i quali un popolo vuole mostrarsi: Genova e i genovesi sono rappresentati dalla bandiera di San Giorgio e dalla Lanterna, ma anche, magari solo in pochettino, dalla croce del Fasce. Per questo occorre rimetterla nuovamente dritta in piedi.

Concludo parlando di Genova. Genova ha importanti eccellenze: penso al porto, agli ospedali, a l'università, all'IIT, alla nautica, e altro ancora; tutto bello, ma i giovani per lavorare devono andarsene. Mancano semrpe i soldi per fare infrastrutture importanti e necessarie. Per questo sembra quasi un miracolo avere cominciato a tirare su il nuovo ponte sul Polcevera. Tantissime volte Genova è abbandonata anche dalle famiglie genovesi più importanti e più ricche che non investono più sul territorio. Allora dobbiamo essere noi, e quando dico noi penso soprattutto al Comune, a ritrovarci sotto la bandiera di San Giorgio, croce rossa in campo bianco, come ci siamo ritrovati nella giornata della "Bandiera di Genova", pe riscoprire la nostra identità di gente che si dà da fare, che si rimbocca le maniche e non ha paura di lavorare. Per fare e per crescere, come dice Lei, bisogna crederci. Noi della Compagna e, ne sono certo, i cittadini di Genova ci crediamo, ci siamo e vogliamo darci da fare sotto la guida del Comune.

Tanti auguri e scignorîa a Voscià e a tutti. Pe Zena e pe San Zòrzo!
Franco Bampi